

道光十六年七月十一日

奏



奏為恭報考試情形仰祈

聖鑒事竊臣自本年正月到任即行文各屬科考四

月十八日臣由省起程按試錦州五月底回省

接考奉天吉林滿合民籍生童於六月底竣事

本年選拔屆期例應隨棚考取臣悉心校閱嚴

禁一切陋規覈其文行兼優者秉公甄拔俟傳

齊到省再會同府尹照例覆試驗看臣伏查奉

天一省生童人數無多文風均屬中平考試亦

少弊竇惟距直隸山東較近間有外來槍手頂

冒入場又有不法棍徒專賃懷挾小本蠅頭細

字累萬盈千尤足壞人心術臣申明約束嚴密

查拏考試奉天府童生正場盤獲槍手劉叔梅等三名又搜出夾帶多名均發交提調審訊分別重懲士子各知恪守場規試畢俱極安靜臣又慮通省地方廣闊平時察識難周分飭各州縣設立稽訟簿按季彙詳尚少生員滋事之案盛京城內舊有瀋陽書院一區擇各學生員中有造之材在院肄業臣按月督課訓以砥礪廉隅敦本務實似皆鼓舞奮興至於

陪都風氣最為淳樸近因五方輻湊未免漸染紛華民間演戲雖已通行禁止而惰游賭博之習恐未盡除且服飾亦競尚新奇至有綠衣紅緣者臣竊惟欲正民風先端士習業經嚴切飭禁

務俾返樸還淳以期仰副

聖主崇實黜華化民成俗之至意再奉天入夏以來
雨澤霑足二麥告登現在秋禾茂盛可望豐收
糧價漸平民情甚為恬謐所有科試完竣及地
方情形理合繕摺具

奏伏乞

皇上聖鑒謹

奏

另有旨

道光十六年七月十一日



